

Партийн сургъулин джилин дигиг

бүрдәмджтәгъяр кехмн

Партийн просвещенә сургъулин джил төгсхнь өбрддж йовна. Тегәд эн көдлмшин дигиг бүрдәмджтә сәәнәр кех төр ода партийн комитетсин өмн зогсджана. Партийн сургъулин джилин дигиг кехин тускар КПСС-н танъгъчин болн зәрм райодин комитетсд совещань хурагддж, күүндвр бояснд, тодрха үүлдвр темдг-лгдв.

Сургъулин джилиг диглдж төгсәлгън амр керг биш. Партийн просвещенә халхар олузусн школс, кружокс, семинарс көдлдж бәәв. Мана танъгъчд эднә тонь 217 күрсмн. Эднә көдлмшнъ әдләр, нег зурагъяр кегддж бәәсмн биш. Болв сургъулин дигиг альд болв дигн делгү кех кергтә. Эн учр партийн комитетсин болн эклц партийн организацсин күпәх көдлмшнъ ик.

КПСС-н танъгъчин комитетин шиидврәр, танъгъчин партийн организацд эн джил сургъулин зура куцәлгънә дигнъ майин хойрдгч өрәлд кегдх зөвтә. Политшкол, кружок, семинар болгъна көдлмшин дигиг кенә гисн даалъврта, ик килмдж тусхах керг.

Политшколмудт, кружокст, семинарст болн тодрха экономик дасджах школмудт сургъулин диг келгънә занятыс болх зөвтә. Пропагандист улс дасчкисн темсәсн хойр-негн тем авад, терүгәрн дигин занятыс кех учрта. Иим занятыс, сурч йовх улсин медрлнъ ягъдж өссинъ, терүгән эдн ягъдж батлдж чадсинъ йилгъдж медүлх зөвтә.

Сургъулин программан чиләгъәд уга болхла партийн комитетс энүнд онц оньган тәвцхәх зөвгә. Улдсн цагин эргид кружокс, школмуд, семинарс тасрлтан угагъяр көдлх, дасх зөвтә төрмүдән күтцднъ дасх, энүнәннъ даруд оч дигин занятыс кех учрта. Болв сургулин цагг зусн-зүүл учр харгъад, занятыс полхиг таслад йовдг чигн уршг үзгдджәнә. Яшкульск района „Кировский“ совхозин эклц партийн организацд (сегләтрнъ үр Т. Кичиков) КПСС-н туудж даслгъна кружок муугъяр көдлнә, сургъульднъ таслвр гарад йовна. Иим үлгүрмүд эн района талин организацд чигн үзгднә, нань зәрм райодт бас бәәнә.

Эврән бийснъ политическ сургъуль дасджах коммунистнр, интеллигенц улс бәәхиг марти зөв уга бидн. Эдн дунд теоретическ конференцс, эс гидж күүндвр, семинарск занятыс, эс гидж күн болгънланъ онцднъ күр кесн чик болх зөвтә.

Партийн сургъулин джилин дигнъ школмудар, кружоксар,

семинарсар куцдән кегддж төгсхлә, партийн комитетст болн партийн хургудт тәвдж күүндвр болад, марксистск-ленинск сургъулиг коммунистнр цааранднъ даслгъиг ясрулхин туск төрмүд урднъ хәләгддг бәәсмн, ода чигн тер зокалар кегдх зөвтә. Пропагандистнр улсиг хурадж, сургъулин джилин дамшлтин тускар күүндвр кесн бас ик сән болхмн.

Урдк джилмүд мет эн джил чигн партийн организацс партийн сургъулин джилин дигинъ кем цацу, сургъулин шин джилд белдлгъ эклцхәх зөвтә. Энүнд, урднъ бәәсн эндү бичә давтгдтха гидж, сургъулин джил эклх цаг ирхиг күләлго, оданас авн коммунистнрин дуринъ сурдж, сургъуль ягъдж сурхар бәәхинъ йилгъдж авх—түрүн нег керг гидж тоолгдхмн. Энүнә даруд кергтә болх пропагандистнр белдхиг чикәр кедж болхмн.

Пропагандистнр улсин нилчнъ марксистск-ленинск теорий дасхд йилгъу ик болдгнъ ил темдгтә. Эн төләд пропагандистнр белдлгънд онц оньган тәвхмн. Нидн джил мана танъгъчд 80 гар пропагандистнр Ставрополь балгъснд белдгдлә. Болв теднә тонь манд багъ болсмн. Партийн просвещенә шин джил эклх күртл района партийн комитетс бийсдән кергтә пропагандистнр улсиг диглдж, курст йовулдж белдвринъ өбдлүлхд килмджән тусхах—теднә нег ах кергнъ болджана.

5500 шаху күн партийн сургъуль мана танъгъчд дасдж йовна. Тегәд эдн цугтан сургъулин программан куцднъ дасдж, политическ медрлән өбдлүлснә дигинъ келгън ик чинртә төр болджана. Дигин занятысиг идеян ик өбдән кирцәтәгъяр кедж, сургъулин джилин дигиг бүрдәмджтә кевәр кех партийн организацсин ода цагин ах нег кергнъ.

Эн джил партийн просвещенъд партийн организацсин куцәдж йовх көдлмшләнъ дигтәгъяр ирлцджәх материал дасгдсмн. Эн учрар дигин занятыс кехләрн теднәс голлгч төр авч күүндврт тәвәд, ода кегддж йовх көдлмшин йовудинъ уралан хурддулхд тусхадж, залгълдулдж кех кергтә.

Партийн сургъулин джил тогссәр идеологическ көдлмш сулдад, зогсад одх учр уга. Лекционн пропаганда делгүрүлдж, барар дамджулдж коммунистнрт болн куч-көлсчнрт делгү өргнәр политическ цәәлгъвр өглгънд улм оньг тусхадгх зөвтә.